


清會典 七十一

禮部十五六



漢書  
九〇八號

漢書門		
九〇八	一三二	一六〇
類	號	函
架	冊	冊

內閣文庫		
九〇八	一三二	二五五
漢書	類	號
冊	冊	架

內閣文庫		
番號	漢	908
冊數	160 ( 42 )	
函號	295	10



Kodak Gray Scale

A 1 2 3 4 5 6 M 8 9 10 11 12 13 14 15 B 17 18 19



© Kodak, 2007 TM: Kodak



大清會典卷之七十一

禮部儀制司

官員禮

朝廷莫如爵。故官員行禮。類依品級等次。凡相遇有讓道迴避之儀。相見有序坐庭叅之別。尊卑上下。秩然不可紊越。茲備著之。而儀從之制附焉。

京官迴避儀

崇德元年。定。固倫額駙出行。鎮國公。和碩公主。額駙。遇。分路行。輔國公。鎮國將軍。民公。都統。尚書等官。遇。讓道旁行。輔國將軍。副都統。侍郎。及



大清會典 卷之七十一 禮部十五 一

叅領等官。遇勒馬。立於道旁候過。佐領等官以

下。遇俱下馬候過。若額駙係親王。郡王。貝勒。各照本爵。超等公。和

碩公主額駙。出行。都統。精奇尼哈番。尚書等官。

遇。讓道旁行。副都統。侍郎。叅領等官。遇勒馬。立

於道旁候過。佐領等官以下。遇俱下馬候過。若

駙係親王。郡王。貝勒。貝子。各照本爵。民公。郡主額駙。出行。都統。精

奇尼哈番。尚書等官。遇分路行。副都統。侍郎等

官。遇。讓道旁行。叅領。佐領等官。遇勒馬。立於道

旁候過。護軍校。驍騎校等官。及軍民人等。俱下

馬。候過。都統。精奇尼哈番。尚書。縣主額駙。出行。

副都統。侍郎等官。遇。讓道旁行。叅領。佐領等官。

遇。勒馬。立於道旁候過。護軍校。驍騎校等官。及

軍民人等。俱下馬候過。內大臣。副都統。護軍統

領。前鋒統領。郡君額駙。大學士。侍郎等官。出行。

叅領等官。遇。讓道旁行。佐領等官。遇勒馬。候過。

護軍校。驍騎校等官。及軍民人等。俱下馬候過。

一等侍衛。護衛。叅領。前鋒。叅領。縣君額駙。學士。

滿啓心郎。郎中等官。出行。佐領等官。遇。讓道旁

行。護軍校。驍騎校等官。及軍民人等。俱勒馬。候

過。二等侍衛。護衛。鄉君額駙。佐領。漢啓心郎。員

外郎等官。出行。護軍校。驍騎校等官。及軍民人等。遇。讓道行。凡超品公以下。文武各官命婦。俱照本夫迴避例。○又定。凡奉

欽差。及捧齋

勅旨。或

欽賜恩賞者。遇應迴避官。不下馬。分路行。○順治八年。題准。侯伯。與民公同。阿思哈尼哈番。與副都統同。阿達哈哈番。與叅領同。拜他喇布勒哈番。拖沙喇哈番。與佐領同。內大臣。改與都統同。○九年。題准。民公。和碩公主。額駙。郡主。額駙。侯。伯。

出行。都統。精奇尼哈番。尚書等官。遇。分路行。副都統。侍郎等官。遇。讓道旁行。叅領。郎中。佐領。員外郎。拖沙喇哈番。主事等官。遇。勒馬。立於道旁。候過。護軍校。驍騎校等官。及軍民人等。俱下馬。候過。都統。內大臣。精奇尼哈番。尚書。縣主。額駙。出行。副都統。侍郎等官。遇。讓道旁行。叅領。郎中。佐領。員外郎。拖沙喇哈番。主事等官。遇。勒馬。立於道旁。候過。護軍校。驍騎校等官。及軍民人等。俱下馬。候過。護軍統領。步軍統領。副都統。侍郎。阿思哈尼哈番。前鋒統領。郡君。額駙等官。出行。

叅領。郎中等官。遇讓道旁行。佐領。員外郎。拖沙喇哈番。主事等官。遇勒馬候過。護軍校。驍騎校等官。及軍民人等。俱下馬候過。一等待衛。護衛。叅領。阿達哈哈番。郎中。縣君。額駙等官。出行。佐領。員外郎。拖沙喇哈番。主事等官。遇讓道旁行。護軍校。驍騎校等官。及軍民人等。遇俱勒馬候過。二等待衛。護衛。拜他喇布勒哈番。佐領。員外郎。鄉君。額駙。拖沙喇哈番。主事等官。出行。護軍校。驍騎校等官。及軍民人等。遇讓道行。凡民公以下。文武各官命婦。俱照本夫迴避例。○康熙

十八年。題准。在京武職。民公。侯。伯。以下。散秩大臣。阿思哈。尼哈番。以上。文職。大學士。尚書。以下。學士。大九卿。以上。許用引馬一騎。官卑者。及軍民人等。遇俱照例下馬迴避。違者送該部議處。其不應用引馬而擅用者。官交該部議處。民。父。刑部治罪。

外官相見儀

順治十二年。題准。提督見總督。由中門入。至儀門外下馬。總督至提督堂前下轎。坐次。總督正坐。提督侍坐。如提督有精奇。尼哈番者。總督居

左提督居右。文移。總督用劄付。提督用咨呈。與巡撫相見。坐次。及文移。俱平行。如巡撫加兵部銜者。提督於儀門外下馬。與巡按司道。府廳相見。坐次。文移。俱平行。惟府廳於提督儀門外下轎馬。州縣見提督。俱由角門出入。提督迎送至堂簷下。後堂待坐。州縣官旁坐。文移。用呈稟。總兵官見總督。用履歷手本。由儀門進。堂上三揖。總督答禮。後堂待坐。總督正坐。總兵官旁坐。出。送至堂簷下。見巡撫。參堂待坐。巡撫拜總兵官。大堂列坐。俱至儀門下轎馬。迎送至下轎馬處。

文移。俱用手本。巡撫加兵部銜者。總兵官由角門進堂上三揖。巡撫答禮。後堂待坐。出。送至二門。與巡按相見。行賓主禮。與分司司道。運司相見。俱平行。文移。俱用手本。與府廳相見。俱平行。總兵官文移行府。仰經歷司抄文呈堂。府亦行經歷司。轉呈總兵官。與州縣相見。行賓主禮。文移用關牒。副將見總督。用履歷手本。行一跪稟拜。免。仍行一跪一揖禮。簷下侍立。待茶。旁立。三

躬出。如無府銜者。不待茶。

初次披執進見。行一跪一揖禮。出更衣。再

見。行禮同。見巡撫。行庭參禮。待茶。加府銜者。照司道

例進見。參堂待茶。出。送至月臺口。候入煖閣。三揖。出。隨看拜。無府銜者。不迎。送看拜。初次披執進見。庭參出。更衣再見。行禮同上。見巡按。巡漕。巡鹽。學政。加府銜者。先稟披執。免。用官銜手本。於大門外下馬。由儀門進。走西甬道。各院迎至月臺下甬道中。同上堂。三揖。遞履歷。遞公文。各一揖。掩門。參堂待茶。對坐。出入讓各院先行。同下堂。三揖。送至二門外。副將候各院到公座邊。三揖。出。副將自稱官銜。回看不用帖。如副將管叅將事。見巡按。行庭參禮。用脚色手本。與布按二司相見。俱平行。文移用手本。走

按察司夾道門。與各道相見。俱平行。文移用手本移會。如協守副將。於二門外下馬。由中道進。本道迎至月臺下。堂上待茶。出。送至二門外。看乘馬。與各部分司。運司。府。廳。州。縣。俱平行。叅將遊擊。見總督。用履歷手本。披執進見。行一跪一揖禮。出。更衣再見。行一跪一揖。稟拜。四叩頭。出。見巡撫。由角門進。至堂簷下。行全屬禮。耳房待茶。出。仍行全屬禮。旁立。三躬出。見操撫。用履歷手本。行禮。與見總督同。見巡按。由角門進。至捲棚中。行全屬禮。侍立。待茶。畢。仍行全屬禮。旁立。

三躬出。初見仍見布按二司俱平行。文移用咨

文。走按察司夾道門。於二門外下馬。掩門。參堂

待茶。劄委者不在此例。見分司。運司。各道俱平行。於二

門外下馬。由中門進。本道迎至堂口。參堂待茶。

送至二門外。看乘馬。文移用手本。劄委者不在此例。與

府廳州縣相見。俱平行。都司見總督。與參將見

總督禮同。掌印都司隨二司見巡撫。稟拜。免行

三揖禮。掩門。後堂待茶。仍至前堂。三司打躬出。

如單見。仍行庭參禮。僉書操捕都司。行都司。與

掌印都司同。凡各都司。初見。及霜降揚威日。俱

披執進參。出更衣。再進。照司道例待茶。掌印都

司見巡按。由中門進。至堂臺。作揖。二堂待茶。初

見。稟披執。常見。隨二司不跪。單見。行一跪一揖

禮。僉書操捕都司同。行都司見巡按。由中門進。

於西滴水簷前。行一跪一揖禮。畢。向東一躬。至

衙仗。向上三躬。由西旁行至中門。出。掌印僉書

操捕各都司。與布按二司相見。俱平行。文移用

咨文。走按察司夾道門。於二門外下馬。掩門。參

堂待茶。劄委者不在此例。見各道。俱平行。劄委者不在此例。營

都司。屯田都司。於本道行庭參禮。見各部分司



大清會典 卷一百一十一  
俱平行。行都司見戶部分司。二門外下轎。後堂待茶。分司回拜。方臺下轎。大堂待茶。營都司見分司。用官銜手本。堂前行禮。畢。一躬。卽出。與運司。府。廳。州。縣。官相見。俱平行。專城。並道標。及各營中軍守備。見總督。巡撫。巡按。俱由角門進。至堂簷前。行庭叅禮。初見。披執行禮。各衛掌印守備。并城守守備。中軍守備。俱行全叩禮。見布按。二司。各道。用脚色手本。行庭叅禮。文移用申呈。初見。稟披執。加都司銜者。仍行守備禮。見分司。堂前行禮。分司答躬。文移用呈。分司用仰牌。見

知府。用手本。行屬禮。文移用呈。府用照會。見廳官。州縣官。俱平行。凡提督。總兵官以下。守備以上。遇督。撫。巡。按。出城閱兵操演。俱披執。○十三年。題准。州。縣。見提督。及總兵官。大門外下馬。由東角門進。至堂簷下。向上三躬。茶房待茶。提督。總兵官。正坐。州。縣。侍坐。茶畢。稟辭。由西角門出。不看拜。文移。州。縣。用申文。提督。總兵官。用照會。見副將。用官銜手本。大門外下馬。進中門。由甬道東邊。至堂簷下。向上三躬。副將還禮。後堂待茶。送至堂前出。至大門外上馬。文移。州。縣。用牒

呈。副將用照會。其餘文武各官相見儀。俱與十二年定例同。○十八年。題准。提督往總督衙門。總督迎至儀門。提督儀門外下轎馬。總督往提督衙門。提督迎至儀門。總督儀門外下轎。送至各迎處。坐次。總督正坐。提督僉坐。文移俱用咨文。與巡撫相見。俱平行。文移俱用咨文。司道。分司。運司。見提督。於二門下轎馬。提督迎出簷下。至堦。提督見司道等官。司道等官迎出儀門。提督儀門下轎馬。送至各迎處。坐次。提督正坐。司道等官侍坐。文移。提督用照會。司道等官用咨

呈。府廳。往見提督。於大門外下轎馬。由中門進。坐次。提督正坐。府廳侍坐。提督迎送至簷下。文移。提督用劄付。府廳用牒呈。州縣見提督。於大門外下轎馬。由東角門進。提督不迎送。文移。提督用劄付。州縣用申文。總兵官往總督衙門。至二門外下馬。總督出簷迎至堦上。總督往總兵官衙門。於儀門內下轎。總兵官迎出儀門。送至各迎處。坐次。總督正坐。總兵官侍坐。文移。總督用照會。總兵官用咨呈。與巡撫相見。行賓主禮。文移。俱用咨文。與分司。司道。運司。相見。俱平行。

文移俱用咨文。府廳見總兵官於二門外下轎馬。總兵官迎至簷堦。總兵官見府廳於儀門外下轎馬。府廳迎出儀門外。送至各迎處。坐次。總兵官正坐。府廳侍坐。文移。總兵官用照會。府廳用咨呈。州縣見總兵官於大門外下轎馬。由中門進。總兵官迎送至簷下。坐次。總兵官正坐。州縣侍坐。文移。總兵官用照會。州縣用咨呈。副將掌印都司見總督。用履歷手本於大門外下馬。由角門進。總督迎送至簷下。免披執跪禮。見巡撫。由中門進。至儀門外下馬。巡撫迎至簷下。巡撫往

副將衙門。至堂前下轎。副將迎出儀門外。送至各迎處。坐次。巡撫上坐。副將侍坐。文移。巡撫用照會。副將用咨呈。免披執庭參。與分司司道。運司。府廳相見。俱行賓主禮。文移俱用手本。州縣見副將。用官銜手本。於大門外下轎馬。由中門進。走甬道邊。副將迎送至簷下。文移。副將用照會。州縣用牒呈。免向上三躬。參將遊擊以下武官見總督。用履歷手本。行一跪三叩頭禮。免披執。見巡撫。於大門外下馬。由中門進。坐次。巡撫正坐。參將遊擊侍坐。巡撫迎送至簷下。文移。巡撫用劄付。參

將遊擊用牒呈。與布按二司相見。俱平行。文移。

俱用咨。劄委者。不在此例。與各道分司。運司。俱行賓主

禮。文移。俱用手本。劄委者。不在此例。與府廳。俱行賓主

禮。文移。俱用平關。與州縣。俱平行。文移。俱用手

本。掌印都司。營都司。行都司。屯田都司。操捕都

司。衛守備。守禦所千總。衛千總等官。見巡撫。於

大門外下馬。由角門進。巡撫不迎送。守禦所千

總。衛千總。行一跪三叩頭禮。巡撫與各都司文

移。用劄付。各都司用申文。巡撫與守備千總。文

移。用牌票。守備千總。用申文。免披執。全屬禮。各都司見

布。按二司。俱行賓主禮。文移。俱用手本。劄委者。不在此

例。各都司與各道分司。運司。俱平行。文移。俱用

手本。各都司與府廳。州縣。俱平行。文移。俱用平

關。分防標下中軍。守備。掌印。專城。并道標中軍。

及各營中軍。守備。見巡撫。於大門外下馬。由角

門進。巡撫不迎送。文移。巡撫用劄付。各守備用

申文。免披執。行屬禮。見司道。用官銜手本。於大門外下

馬。由中門進。走甬道邊。司道迎送至簷下。文移。

司道。用照會。各守備用牒呈。見分司。府廳。州縣。

俱行賓主禮。文移。俱用手本。凡鎮守各省將軍。

與總督巡撫提督總兵官相見。各不相轄。俱行賓主禮。文移俱用咨。其餘文武各官。見本省將軍。俱如見總督禮。○康熙二十年。題准。宣屬廳員。有稽察錢糧之責。其屯衛守備。行屬官禮。○二十二年。題准。協領。叅領等官。見督撫。照布。按。兩司例行。佐領。防禦等官。照各道員例行。驍騎校以下官員。照知州。知縣例行。○二十九年。題准。各關監督。與督撫相見。及用文移之處。俱照副將與巡撫相見。行文例行。至司道以下相見。行文之處。亦照副將例行。○三十三年。定。督撫。

開門視事。撫先。督後。逢五逢十。督撫司道府廳等官。俱停其相見。在外大小各官。除朝賀祭祀。及到任外。相見不用朝服。

八旗官員理事儀

雍正五年。定。八旗公所辦事。都統正坐。副都統旁坐。其叅領。於副都統稍後兩旁坐。佐領以下。及散秩官員。各照品級序坐。有事。叅領起立回話。佐領以下官員。俱屈一足回話。其侍衛。藍翎侍衛。並拜他喇布勒哈番以上之副叅領。署叅領。俱照叅領之例行。拖沙喇哈番以下之副叅

領署參領俱照佐領之例行。驍騎校等官有事於參領前。屈一足回話。於佐領前。侍立回話。閒散官員。如有公事。於都統。副都統前。阿思哈尼哈番以上官員。侍立回話。阿達哈哈番以下官員。屈一足回話。管旗務之王。宗室公前。參領以下官員。俱屈一足白事。管佐領之大人。各照品級行。小京堂。以及科道等官。管佐領者。照參領之例行。宗室管佐領者。在旗下大人前。俱侍立白事。其前鋒統領。護軍統領。在各公所辦事。前鋒參領。前鋒侍衛。護軍參領。侍衛。副參領。藍翎

副參領。侍衛署參領。拜他喇布勒哈番以上副參領。署參領。俱照八旗參領之例行。拖沙喇哈番以下副參領。署參領。護軍校。副參領。署參領。俱照八旗佐領之例行。前鋒校。護軍校。俱照八旗驍騎校之例行。其步軍統領衙門辦事。步軍統領正坐。步軍總尉旁坐。步軍副尉。在步軍統領前。屈一足白事。在步軍總尉前。侍立白事。步軍校。城門校。於統領。總尉前。俱屈一足白事。於副尉前。侍立白事。凡八旗官員在公所辦事。如遇別旗大人。亦照見本旗大人之例行。倘有越

分違例任意行走者。聽該管大人。並查旗御史題叅。交與該部議處。又奉

旨。宗室管佐領者。於王公前。著屈一足回話。

京官理事儀

雍正五年。

論。聖人之道。爲人臣者。過闕必趨。而於家庭父母之前。亦有趨庭之禮。孔子云。事君盡禮。人以爲諂。蓋因敬謹之念。素存於中。故舉動威儀之間。自無怠忽。非勉強於臨時也。前者大朝之時。有漢司官二人。於班聯之中。大失禮節。朕降嚴旨。欲重二人之

罪。嗣後衆人皆知儆惕。不蹈前轍。因而寬釋。至於引見之時。往往漢官有在朕前高視濶步。舉止不恭者。又聞各部司官。辦理公事。滿司官之見滿堂官。則屈一膝應對。而漢司官之對堂官。則或立或蹲。一任其意。同一堂司。而何以滿漢之禮互異。卽科道滿漢禮節。亦不相符。且漢司官陞遷。方爲道府。道府之見督撫。卑躬屈節。竟有違例朝服匍匐跪道。惟恐以簡畧獲罪者。夫督撫品既不及部院堂官。而司官品級。則又卑於道府。何以爲京官。則傲慢不恭。而爲外吏。則謙抑過度。是不知爵位之

尊卑。而但論權勢之輕重也。且漢官之妄自尊大者。大約由於科目出身之人。牽制於師生年家之陋習。是以將禮節習沿。漸至簡畧。豈可以國家之體統。而徇科目之私情耶。司官不敬堂官。相沿日久。視爲固然。從來不知禮儀。是以至朕御前。不能約束身心。每露草率不恭。自蹈失儀之叅處也。前代人主見臣下失禮之處。往往不肯明言者。蓋欲默識於中。以觀衆人存心敬肆之真實。此亦自有深意。若朕則不然。朕以誨人不倦爲心。故有一見聞。卽明白指示。欲其醒悟。悛改。不忍聽其暗昧終

身。大凡爲司官而不敬堂官者。其人必無上進之志。自畫之輩。目前雖爲司官。何知將來不至堂官之位也。輕人者人亦輕之。此往復必然之理。何迷而不察乎。滿漢司官之禮。自應畫一爲是。其如何酌定之處。著九卿會議具奏。遵

旨議定。各部院司官。路遇堂官。勒馬候過。在本衙門辦事。堂官高坐。司官做稿侍立說堂。若事件繁多。司官席地鋪氈序坐說堂。如在朝房辦事。堂官席地坐。司官俱屈一足回話。堂官前往來。俱趨走。滿漢司官。應令一體遵行。不得互異。如有



或蹲或立。怠慢不恭者。堂官指名題叅。交部議處。其漢科道。俱照滿科道禮節。畫一遵行。違者。亦令堂官叅處。如有牽制師生年誼。姑息優容。不行叅出者。尚堂官一併交部議處。

官員儀從

凡京官儀從。崇德間定。固倫額駙。彩畫雲紅傘一柄。豹尾鎗二桿。旗六桿。紅杖二桿。其執事八役。青衣。紅帶。青氈帽。銀頂。上插紅翎。城內。止排傘。杖。超品公。和碩公主額駙。金黃傘一柄。豹尾鎗二桿。旗六桿。城內。止用夜不收二名。後隨人

十名。民公。郡主額駙。金黃傘一柄。豹尾鎗一桿。旗六桿。城內。止用夜不收二名。後隨人八名。都統。精奇尼哈番。尚書。縣主額駙。金黃傘一柄。旗六桿。城內。止用夜不收二名。後隨人六名。內大臣。大學士。副都統。護軍統領。前鋒統領。侍郎。郡君額駙。旗六桿。城內。止用夜不收二名。後隨人四名。一等待衛。衛叅領。前鋒叅領。縣君額駙。學士。滿啓心郎。郎中。旗四桿。城內。止用後隨人四名。二等待衛。護衛。鄉君額駙。佐領。漢啓心郎。員外郎。旗二桿。城內。止用後隨人二名。三等待

衛護衛護軍校主事以下官員許隨從一人。○  
順治三年定。公掌扇貼方金一塊。一品官掌扇  
貼圓金四塊。二品官掌扇貼圓金三塊。三品官  
掌扇貼圓金二塊。四品官用灑金掌扇。五六七  
品官用素黑掌扇。八九品官用白掌扇。○六年  
定。公以下四品官以上用大灑金扇一把。小灑  
金扇一把。文官用甘蔗棍一對。武官用棕竹棍  
一對。○八年題准。民公和碩公主額駙。杏黃傘  
二柄。旗十桿。大小扇二把。貼方金四塊。侯。郡主  
額駙。杏黃傘一柄。旗十桿。大小扇二把。貼方金

三塊。伯。杏黃傘一柄。旗十桿。大小扇二把。貼圓  
金一塊。一品官。杏黃傘一柄。旗八桿。大小扇二  
把。貼圓金四塊。二品官。杏黃傘一柄。旗六桿。大  
小扇二把。貼圓金三塊。三品官。杏黃傘一柄。旗  
六桿。大小扇二把。貼圓金二塊。四品官。旗四桿。  
灑金大小扇二把。五品以下官。仍照三年例行。  
以上傘旗。止許京城外用。京城內不許排列。凡  
宗室覺羅各官。扇柄及棍。俱用紅油。凡各官進  
皇城。止用小扇。不許用大扇及棍。○九年題准。公  
侯。伯。都統。尚書。內大臣。大學士。與漢文官三品

以上。

皇城外坐四人暗轎。願乘馬者聽。漢武官不許坐轎。凡扇上各書銜。滿字一行。漢字一行。○康熙元年。題准。滿公侯伯都統內大臣鎮國將軍精奇尼哈番輔國將軍護軍統領前鋒統領副都統阿思哈尼哈番大學士學士尚書左都御史侍郎副都御史鑾儀使通政使大理寺卿以上在。

皇城外坐四人暗轎。願乘馬者聽。○又定。停滿漢學士副都御史鑾儀使通政使大理寺卿排執事坐轎。○又定。公和碩公主額駙旗十桿。杏黃傘二柄。金黃棍二對。執事人青衣綠帶紅氈帽。銅頂上插綠翎。京城內止用傘一柄。侯伯郡主額駙旗十桿。杏黃傘一柄。金黃棍二對。執事人服色與公同。都統鎮國將軍內大臣縣主額駙精奇尼哈番滿漢大學士尚書左都御史等旗八桿。杏黃傘一。金黃棍一對。執事人青衣綠帶紅氈帽。銅頂上插綠翎。輔國將軍郡君額駙護軍統領前鋒統領副都統阿思哈尼哈番滿漢侍郎學士九卿正卿鑾儀使副都御史步軍

總尉等。旗六桿。杏黃傘一柄。金黃棍一對。執事人服色與都統同。三品官。執事與輔國將軍等同。四品官。旗四桿。京城內。一品官以上。用傘一柄。棍一對。二品官。棍一對。○三年。題准。阿思哈尼哈番。散秩大臣。在京城內。停排執事。京城外。許排。散秩大臣內有世襲精奇尼哈番者。照精奇尼哈番品級排執事。○四年。題准。四品以上官。乘馬。准用踢胸。凡在京文官。大九卿。詹事以上。武官。副都統。阿思哈尼哈番。散秩大臣以上。准令一人引馬前導。其餘各官。不許用引馬。○

五年。題准。各省駐防將軍。副都統。照在京都統副都統。排列執事。○七年。題准。凡加太師公。和碩公主額駙。金黃棍二對。改爲紅棍二對。棍頭用銅鑲。執事人。用綠布衣。綠帶。紅氈帽。銅頂。上插綠翎。傘扇。照前定例。民公。及加級侯。郡主額駙。金黃棍二對。改爲紅棍二對。棍頭用銅鑲。執事人衣服。仍照舊例。○八年。題准。在京官。停用杏黃傘。金黃棍。民公以下官員。俱照順治八年例行。民公以下官員出京城。許用鞍籠。閒馬前導。軍民人等不許用。違者治罪。

大清會典 卷七十一  
凡外官儀從。康熙七年題准。總督。杏黃傘二柄。金黃棍一對。旗八桿。扇二把。兵拳一對。鴈翎刀一對。飛虎旗一對。獸劍一對。桐棍一對。槲棍一對。對。鎗二對。迴避牌一對。肅靜牌一對。巡撫。杏黃傘二柄。金黃棍一對。旗八桿。扇二把。獸劍一對。桐棍一對。槲棍一對。對。鎗一對。迴避牌一對。肅靜牌一對。布政使。按察使。杏黃傘二柄。金黃棍一對。旗六桿。扇二把。槲棍一對。迴避牌一對。肅靜牌一對。各道。掌印都司。知府。杏黃傘一柄。旗四桿。扇一把。桐棍一對。槲棍一對。迴避牌一對。肅

靜牌一對。同知。通判。知州。知縣。藍傘一柄。扇一把。桐棍一對。槲棍一對。迴避牌一對。州同。州判。縣丞。藍傘一柄。桐棍一對。典史。雜職。竹板一對。提督。杏黃傘二柄。金黃棍一對。旗八桿。扇二把。兵拳一對。鴈翎刀一對。飛虎旗一對。鎗二對。獸劍一對。刑杖一對。迴避牌一對。肅靜牌一對。總兵。杏黃傘二柄。金黃棍一對。旗八桿。扇二把。大刀一口。獸劍一對。鎗一對。迴避牌一對。肅靜牌一對。副將。杏黃傘二柄。金黃棍一對。旗六桿。扇二把。迴避牌一對。肅靜牌一對。叅將。遊擊。都司。

杏黃傘一柄。扇一把。旗四桿。桐棍一對。迴避牌一對。肅靜牌一對。守備。杏黃傘一柄。扇一把。桐棍一對。旗四桿。

官員命婦

崇德間定。超品公命婦車。青蓋。青幃。青垂簷。三等公命婦車。青蓋。青幃。藍垂簷。都統。精奇尼哈番。尚書等官。命婦車。青蓋。藍幃。青垂簷。內大臣。大學士。副都統。護軍統領。前鋒統領。侍郎等官。命婦車。藍蓋。藍幃。藍垂簷。一等侍衛。護衛。叅領。前鋒。叅領。學士。滿啓心郎。郎中等官。命婦車。藍

蓋。白幃。藍垂簷。二等侍衛。護衛。佐領。漢啓心郎等官。命婦車。藍鑲白蓋。白幃。藍垂簷。○順治八年。題准。三等公命婦車。青蓋。青幃。綠鑲蓋角。綠垂簷。銀頂。侯。伯。命婦車。青蓋。青幃。綠垂簷。銀頂。一品官。命婦車。青蓋。青幃。青垂簷。銀頂。二品官。命婦車。青蓋。藍幃。青垂簷。錫頂。三品官。命婦車。藍蓋。藍幃。青垂簷。錫頂。四品官。命婦車。藍蓋。藍幃。藍垂簷。錫頂。五品以下官員。命婦車。藍蓋。藍幃。無垂簷。錫頂。庶民妻車。藍蓋。藍幃。無垂簷。黑油木頂。○康熙元年。題准。三品以上官員。命婦

車用銀頂。四品以下至民婦車。俱用錫頂。違者治罪。○三十年定。三等公命婦車。綠蓋。青幃。青鑲蓋角。綠垂簷。佐伯命婦車。綠蓋。青幃。藍鑲蓋角。綠垂簷。內大。都統。大學士。尚書。左都御史。精奇尼哈番。命婦車。青蓋。青幃。綠鑲蓋角。綠垂簷。閑散大臣。前鋒統領。護軍統領。步軍統領。副都統。侍郎。學士。副都御史。通政使司。通政使。大理寺卿。詹事府詹事。阿思哈尼哈番。命婦車。青蓋。青幃。綠垂簷。以上車蓋幃垂簷。俱用素緞。一等待衛。叅領。步軍總尉。王府長史。太常寺。太僕寺。光祿寺等

正卿。國子監祭酒。通政使司左右通政。大理寺少卿。督捕衙門理事官。內閣侍讀學士。翰林院講讀學士。侍講。侍讀。詹事府少詹。庶子。諭德。洗馬。鴻臚寺正卿。郎中。給事中。監察御史。太常寺太僕寺。光祿寺等少卿。阿達哈哈番。命婦車。青蓋。青幃。青垂簷。以上俱用銀頂。閑散宗室。二等待衛。佐領。貝勒。長史。欽。監監正。內閣侍讀。國子監司業。鴻臚寺少卿。通政使司叅議。詹事府中允。員外郎。步軍副尉。拜他喇布勒哈番。命婦車。青蓋。藍幃。青垂簷。三等待衛。拖沙喇哈番。五品以下

官員命婦車。藍蓋。藍幃。青垂簷。以上俱用錫頂。蓋幃垂簷用布。轅輪用青。民公侯伯以下有頂帶官員以上命婦車。各照伊夫現在品級。不准以加級用。

大清會典卷之七十一

大清會典卷之七十二

禮部儀制司

貢舉一

科舉通例

朝廷設科取士。順治二年秋。始行鄉試。三年春。始行會試。嗣後定以子午卯酉年八月鄉試。辰戌丑未年二月會試。間奉

特旨開科。則隨時定。茲以通例載於前。而以鄉會等試分列於後。

凡科舉。順治二年。定。遇鄉試年。照各直省每額中舉人一名。止許取應試生儒三十名。提學考



試精通三場者。方准應試。不得將初學之士。冒濫應試。亦不許仕宦子弟。於父兄原任衙門移文起送。多送者。監試官徑行裁革。不許入場。如取送過多。查叅處。○又定。教官。及在籍恩歲貢生。監生。願就本省鄉試者。俱許與生員一體考送。卷面書官字。貢字。監字。另案發落。儒士必三場俱通者。方准應試。至考選遺才。務照應取名數錄送。其假滿病痊事結。未經補考者。不得混錄。○又定。在監肄業貢監生。俱聽本監官考選科舉。臨場不准改名改經。其各省貢監生。願

就本省鄉試者。與生員一體編號。不得另分皿字。若仍赴學政。及吏部。考送京府應試。通編皿字號。亦不許混入生員。至直省現任教職。年力精強。文學優長者。准提學考送應試。○十四年。題准。各省監生。除在部候選。各衙門歷事。及恩拔。歲貢。副榜。官監。在監者。俱准科舉應試外。例監生於本年援者。不准本年應試。○十六年。議准。例監生援納在前。而部文劄監於科舉年方到者。仍准應試。○康熙二十九年。覆准。江南浙江。每中舉人一名。額定錄科六十名應試。○

三十年。覆准。江南。浙江。錄科額數。每中舉人一名。於舊額六十名之外。加四十名。○四十四年。題准。嗣後順天鄉試。應試諸生。務在場期十日以前。咨送。五日以前。投納試卷。逾限。不准入場。○又

諭。凡南巡。考取貢生。監生。帶來纂書者。著翰林院移文咨順天府府尹。一體鄉試。內有生員。亦准一體鄉試。○四十七年。題准。國子監咨送鄉試名冊。於八月初二日始到。與定限十日以前。例不合。除將典簿官。交部察議外。應試士子。仍據冊送試。○

五十一年。題准。

六十萬壽聖節。特開鄉會恩科。照順治丙戌己亥科例。於二月舉行鄉試。八月舉行會試。○五十二年。題准。定例。鄉試咨送。在十日以前。納卷。在五日以前。今學臣續送名冊。已逾定限。但

萬壽開科曠典。多士踴躍觀光。照四十七年例收試。○五十三年。

諭。文武雖分兩途。但文內亦有練習武略者。武內亦有學問優長者。嗣後不拘成例。凡文生員。舉人。願入武場。武生。武舉。願入文場。俱准照鄉試會試例起送。中

大清會典 卷七十二  
式者。造入新冊。不中者。仍各入文武原冊。不准再考。  
○又覆准。凡太醫院及各館。有應舉之生監。俱於各該管處具奏。移送到日。准其考試。其在國子監肄業監生。照例錄選。其在本省監生。願赴京應試者。於鄉試前一年起本省印文到部。劄監。違者。照例議處。○六十年。

諭。凡係奉旨應試之人。各該處具奏咨送。准其應試。其未經具奏。私行咨送者。概不許應試。○雍正元年。恩旨開科。議准。本年四月。舉行鄉試。九月。舉行會試。十月。舉行

殿試。其癸卯甲辰鄉會試正科。改期於雍正二年二月。舉行鄉試。八月。舉行會試。九月。舉行

殿試。○又覆准。候補天文生。及補用天文生之監生。生員。由該監造具年貌三代履歷籍貫經書。送順天府。入皿字號鄉試。○五年。議准。嗣後官生錄科。飭令學臣嚴加考試。不得徇情濫錄。如有文理荒謬者。覺。將學臣一併嚴加議處。

凡冒籍處分。順治二年。定。生童有籍貫假冒。姓系偽謬者。不論已未入學。盡行斥革。仍將廩保懲黜。若有中式者。在內科道。在外撫按。覈實題

叅革去舉人。發回原籍當差。如另有刑喪過犯  
 詐偽夤緣等情。依律治罪。如祖父入籍在二十  
 年以上。墳墓田宅。俱有的據。取同鄉官保結。方  
 許應試。已中科者。優免戶田。亦不得於祖籍  
 近籍。重疊濫免。○康熙三十五年。覆准。嗣後鄉  
 試。如有冒籍中式者。將正副主考官。交與吏部  
 議處。○又覆准。順天鄉試。各省來應試者。取原  
 籍地方官印結。其遠省雲南。貴州。四川。廣東。廣  
 西。福建。湖南。甘肅。此八處在京應試者。仍取正  
 印京官印結。或取同鄉官保結。親身赴部投遞。

如有假冒。將出結官員。一併議處。○三十九年。  
 覆准。除入籍二十年以上進學者。照例不議外。  
 凡在京冒籍舉人。貢監。生員。以部文到日為始。  
 限兩月內具呈自首。禮部查明。改歸原籍肄業。  
 如過期者。不准行。仍照例黜革。其出結等官。亦  
 於兩月限內檢舉。過限者。仍照定例處分。嗣後  
 凡有假冒籍貫。品行不端者。或被告發。或被糾  
 叅。查審明確。即行黜革。仍交刑部。其武舉。武生。亦照例行。  
 ○又定。中式舉人中。有冒籍者。處分收考。送考。  
 出結官。學臣。及地方官。教官。其主考官免議。○

又定。官員不得在現任地方令其子冒籍。違者革職。○又定。順天鄉試。宛大兩縣。審音不詳。草率送試者。照收考送考官例降級。其行查不據實呈報者。照出官例革職。○四十年。覆准。粵西從前冒籍舉人。勒限改歸原籍。出結等官。令其自行檢舉。○五十年。覆准。入籍二十年者。准其考試。定例已久。恐不肖挾仇誣害。著各督撫嚴禁。如敢誣告。從重治罪。○六十年。議准。直隸冒籍進士。舉人。生員。照三十九年例。以部文到日爲始。限兩月內具呈自首。申部查明。改歸原

籍肄業。如過期不行呈首。事覺黜革。交送刑部。照假官例治罪。○又議准。直隸保定等衛軍戶。歷年甚久。卽係土著。恐不肖之徒。假冒衛籍。著嚴飭該府。縣。及教官。查明出具保結。中式後有頂冒等弊。本生。照假官例治罪。送考及出結官員。照狗庇例處分。廩保。黜革。○又議准。直隸各府鄉試生監。中式後。取具同鄉京官連名保結。方准赴順天府府丞填寫親供。

凡試官閱卷。順治二年。定。主考與各房同坐一堂。隨分隨閱。隨取隨呈。去取權衡。專在主考。不

大清會典 卷一百一十二  
得但憑房考薦閱。倘有執拘憤爭者。卽會同監臨提調指叅。○十一年。題准。內閣中書舊例。准鄉會試。而內閣中書亦充鄉試分房。嗣後有內閣中書應鄉試。不得開送內閣中書分房。○又題准。習孤經者。不許充孤經房考。止令擬題。聽主考闡用。○十四年。題准。鄉會場不准分房閱卷。投認師生。其卷面不用分房印子。同經共閱。各列銜名。詳註批語。其春秋禮記。各增一官公閱。以合不分房之例。○十七年。議准。同考官不許分註批語。止列職名。其同考官俱照品級叙

列。如有違式不列。及署名顛倒者。責歸主考官。各降職一級。○又議准。房官闈中作弊。許主考不時據實叅糾。或主考通同房考作弊。內許監試御史外。許該撫。按不時糾叅。其撫按所取簾官內。有關節賄賂敗露者。查係某撫。某按。取用一併治罪。○又議准。闈中遇有薦卷應駁者。抹出不中緣由。明註批語。經三駁者。於卷面上註三駁字樣。俟揭曉日。一同中卷解部。以便查核。至於同考閱卷之時。同經各官。同堂公閱。不許私相商訂。不許別經同考干與。飲食寢宿。各歸

大清會典 卷七十一  
房舍不得恣論縱談。責成主考嚴行申飭。如有故違。立刻扶出。具題叅處。倘主考官狗庇不舉。該撫按體訪得實。一併題叅。○康熙七年。題准。正副主考官遺批取中字。同考官遺批公薦字。罰俸六箇月。○又題准。取中試卷。不印當堂公閱字。如悞押印。正副主考官自行檢舉。免議。如不檢舉。磨勘官看出者。主考官各罰俸六箇月。○十八年。議准。順天鄉試會試。添設內監試御史。正副主考。同考。入闈。各歸本房。不許私訪聚談。至閱卷時。同考官各以薦卷置中間案上。御

史驗明內無私通小帖。方送主考收閱。如有情弊。卽行糾叅。同考如有私人。暗通正副主考。姑容取中。御史卽刻題叅。若同考不將佳卷悉行呈薦。并將荒謬之卷妄薦者。正副主考會同御史查明題叅。同考閱卷佳者。止用句圈句點。不許滿篇密圈密點。混呈主考。御史驗明。送正副主考詳閱圈點。照例註批。填榜之後。卽行封鎖。同考各官。將落卷俱批出不中緣由。開榜之後。順天府出示。於十日內。令本生領取原卷閱看。不許藏匿勒措。如同考妄抹佳文。本生卽赴部

具呈。查明糾叅。若本生文原不佳。妄行控告。除革去生監外。仍交刑部。照誣告例。從重治罪。○又議准。闈中閱卷。停其公閱。公薦。每官闈分硃卷若干。卽於卷面上用某經某房木印。如某房有弊。卽將本房官處分。○五十年。議准。主考官向止閱房考呈薦之卷。今旣寬限揭曉。嗣後主考官。應將房考薦卷外餘卷。亦加遍閱。庶佳卷不致遺落。○雍正元年。議准。房考舊例照額分中。各有定數。雖佳文甚多。不得增於額外。卽甚少。亦必勉強足數。真才遺落。多由於此。嗣後惟

儘佳卷取中。不必拘定房分。○又議准。主考有搜查落卷之責。每因房考已經批抹。文字雖佳。不肯取中。恐磨勘時干碍房考處分。今照會試例。房考批抹之文。主考搜出佳文。仍行取中。至於房考理應細心詳閱。如文字內字句隱僻。一時不能看出。以致塗抹。應寬免處分。若文理明顯。挾私妄抹。仍照定例行。

凡內簾監試。順治二年。定。京闈監試御史。以一月前題請。卽於

欽遣次日入院。○康熙十八年。議准。順天鄉試。內簾



添設滿漢御史各一員。不與文事。專行糾察弊竇。凡遇作弊等項。不時據實糾叅。其封門發題進卷分卷關防一應諸事。向係正副主考管理。今俱令御史管理。至會試內簾。亦添設滿漢御史各一員。悉照順天鄉試各款。一體遵行。其新添滿漢御史。至期與內外監試御史密請具題。欽點入場。正副主考同考。分閱之時。御史同坐一堂。向上對坐。每日晚停閱之時。查明所閱硃卷數目入箱。正副主考與御史共加封鎖。次日公同開閱。不許私帶入房。如違糾叅。○又議准。考官

大清會典事例

九

私訪聚談。薦卷私通小帖。所閱硃卷。私帶入房。凡係場內目擊等項情弊。御史容隱。不行指名題叅。別經發覺。御史降二級調用。○二十六年。覆准。內簾添設滿漢御史各一員。原不與文事實屬無益。應行停止。○三十九年。覆准。會試。并順天鄉試。內簾仍設滿漢監試御史各一員。凡禁令。順治二年。定。直省府州縣地方。每遇鄉試年。先期榜示禁約。仍令巡捕員役嚴加緝訪。如有生儒監生人等。營幹中舉。及積年棍徒。假稱考官親識。多方設計誑騙。污累考官者。照例

大清會典

卷七十一 禮部十六

問擬柳號滿日發烟瘴地方充軍。其生儒監生  
央浼營幹。致被誑騙者。亦照例發遣。科舉入場。  
及開榜之日。如有無藉之徒。挾仇忌才。私寫匿  
名紙帖。揭於街衢。或編就歌謠。預先傳播。以致  
場中雖取中。不敢填榜者。在內。聽巡城御史。及  
五城兵馬司。在外。聽按察司。及應捕人役。緝拏  
到官。依律治罪。見者。即便燒燬。亦不許主試官  
槩以避嫌。妄退文卷。如生儒因訟牽告在官。審  
果不係緊關對証。亦許科場畢日問理。毋墮奸  
計。以長刁風。以後部科各衙門察叅。須憑實據。

不許輕信風聞。輒形章奏。其果有實據者。必鞠  
審賊証明白。依律處治。士子并過付人等。柳號  
三月滿日問遣。如有親識書辦家人。指稱本官  
誑騙。本官自能舉發。卽與紀錄。以示優叙。或士  
子有知爲棍徒所欺。能自出首據實跡報官者。  
特免本生之罪。止重處誑騙之人。若隱忍不報。  
事發一體柳號究遣。至於文體險怪。鑒別不精。  
又當別論。勿得摘取一二影響字句。混入關節  
疏內。反滋弊端。如場後有生儒無端造謗。撰構  
歌謠。士風薄惡。莫此爲甚。監生該監訪出。申禮

部究革。生員院道訪出徑革。○十四年。題准。在京貢院外。令兵部酌撥八旗官一員。及兵丁。分與汛地。同近貢院本旗巡街之官。晝夜巡緝。如有搶劫之徒。卽行嚴拏。送刑部重處。如有徇隱疎漏者。事發。一併究治。永爲定例。○十五年。題准。貢院宜圍墻高峻。溝渠寬深。如修理官因循怠忽者。在外聽外巡察。在內聽內監試。指名叅處。○十七年。

論。會試舉人。場前投遞詩文。于謁京官者。革去舉人。下刑部究擬。京官不行舉首。事發。一體治罪。○又議准。

科場作弊。有關節授受的據者。許指名告發。如挾仇誣捏。匿名揭謠。照光棍例治罪。○康熙三十九年。覆准。主考官有交通囑托。賄賣關節。夤緣中式。事發。情實者。從重治罪。其父兄爲子弟作弊。有官者。革職提問。無官者。從重治罪。○四十七年。覆准。榜後不中之人。如有挾私造謗。希圖僥倖者。令五城御史。並順天府。嚴拏照例治罪。○六十年。議准。鄉會試榜後。考試官有不公之處。許下第舉人。生員。據實赴該管衙門控告。若有聚衆竟往考試官處打鬧。令該地方官立

大清會典 卷七十二  
卽嚴拏。送刑部從重治罪。○雍正元年。

諭。朕聞向來考試。每有妄亂之徒。肆行攪鬧。此風斷不可長。須於考試之前。嚴行曉諭。如有此等妄亂之人。倡率肆行者。務將爲首人等。拏獲數人。重加懲治。以示儆戒。遵

旨議定。行文九門提督。五城御史。順天府。遇有不法之徒。立卽拏送刑部嚴審。若內外簾果有情弊。將各官照例嚴加治罪。若毫無實據。逞私捏造。將本人照光棍例治罪。如該管官不行查拏。照容隱例降二級調用。○又覆准。正副主考及同

考官出場。風聞某考官所中有弊。卽行舉奏。將中式之人。請

旨覆試。本官免其失察處分。倘明知而不舉。則必有通同作弊之處。或經科道糾察。或被旁人告發。交與刑部。審實。照律治罪。○又覆准。考官士子交通作弊。一應採名受賄聽情關節中式者。審實。將作弊之考官。并夤緣中式之舉子。處斬。俱立決。○四年。

論。科場關係大典。若闈中閱卷果有不公。許應試舉子。親身赴都察院控告奏聞。若不軌之徒。假捏污

大清會典卷七十二  
三  
蟻之詞。以洩私憤而撓公事。則國法斷難寬宥。著九門提督及順天府尹。五城御史。密訪嚴拏。卽行叅奏。從重治罪。

凡關防。順治二年定。生儒入場。細加搜檢。如有懷挾片紙隻字者。先於舉場前柳號一箇月。問罪發落。如有倩人代試者。倩代與受代之人。俱一體柳號問罪。其搜檢官役知情容隱者。連坐。○又定。臨場雖有搜檢之法。而場內供應員役。或有預將文字埋藏號舍。及出入處所。或巧爲傳遞。互相容隱。弊竇不易發覺。又有外簾各官。

與諸生認識者。格外差送茶湯酒飯。入號往來。滋弊難防。監臨宜嚴行禁約。容隱者連坐。各役宜嚴選信實。司門宜改易佐貳。點名必互輪識認。門內執法巡邏。廣加偵伺。臨期。或委能幹官二員專察。諸士領卷尋號時。有在號外停立者。登時扶送監臨詰問。坐定出題。一切簾外員役。不許私入號房。傳送茶湯。其深夜受卷時。監臨委一員坐堂上。嚴督受卷官分經收卷。有五十卷。卽時封號入箱。剩有零餘。亦卽封號如法。委一員坐門內。出必照籤稽查。有卷發籤。籤完必

繳毋使不完者闌出。務令卷數與人數相合。其大門內關防務極嚴緊。不許一人闌入。以杜傳遞。○十五年題准。考官入簾。鋪陳等項。俱經內外監試驗明。正副主考許携出題書籍。同考以下不許。至揭曉後出場。照入場例搜檢。○十六年議准。場中坐次編號。令監試提調。公同四所官編印。以絕弊端。其舉子進場搜檢。嚴責各門搜檢官役。如大門搜過無弊。而二門搜出者。將大門搜檢官役處治。○康熙十八年議准。主考各帶三人。同考各帶二人。御史各帶二人。筆帖

式帶一人。進場之時。御史照定數搜檢放入。如正副主考同考。暗帶主文。假粧僕從。隨入內簾者。察出將本官交吏部議處。帶進之人治罪。○又議准。三場硃卷。如有埋藏偷換等弊。監試嚴行根究。題叅重處。○三十九年覆准。監生如有餽獻禮物詩文。假名士刻遺卷。并招搖作弊者。巡城御史察實糾叅。交刑部治罪。○又覆准。場中如有踰墻換卷。代作等弊。提調等官察出題叅。從重治罪。如巡察不嚴。事發。一併嚴加治罪。○四十七年覆准。鄉會試出題考試次日。士子

務盡放出。不許宿場。若次日內不能完卷。連宿場內者。將監試提調及本生。一併交部議處。通行直省一體遵行。○五十三年。覆准。凡考試舉子入闈。俱穿拆縫衣服。單層鞋襪。只帶籃筐小橈食物筆硯等項。其餘別物。令在外留截。如違。嚴加治罪。舉子進院。多在龍門擁擠談論。恐有換卷代作諸弊。嗣後除巡綽營官照常派出外。或叅將。或遊擊。添設一員。在京。每翼。派遣都統一員。副都統一員。同考試官一體入場。坐明遠樓前。同御史管理。漢人。責成營官。旗人。責成都

統等。務令舉子照卷號押進號舍。督同封固。不許私從柵欄逸出。都統營官。三場試畢。令其出場。若管理不嚴。將該管官治罪。又代作傳遞等弊。每多號軍頂冒入場。易於作奸。應移咨提督衙門。嚴飭該營官員。務選正軍。每十名內。以一人爲號頭。將號軍面用印記。預造簡明檔冊。送該管處。如違。事發。將該管官治罪。又凡鄉會試。天晚。不准收卷。卽行封門。如違。將舉子照例治罪。該管官照狗情例議處。又隔牆傳遞文字。或從食物夾帶。窩舖挖孔等弊。皆巡綽官疎忽所

致。嗣後貢院內隔斷墻垣。務高堅修築。窩舖蓆棚。不許挨墻搭蓋。交與巡綽官員。令兵卒晝夜傳籌巡查。如進食物。監試細檢。倘不嚴查。一經弊發。除作弊者從重治罪外。監試巡綽官。俱行議處。○雍正元年。覆准。搜檢不嚴。號舍不清。柵欄不謹。巡瞭不密。致滋弊竇。嗣後中式之人。如有聯號換卷傳遞埋藏夾帶文字等弊。審實。將不行查出之監臨提調。監試。巡察各官。照容隱例降二級調用。外簾搜檢及各所官。照溺職例革職。如通同作弊受賄者。交送刑部計贓治罪。

凡卷冊。康熙七年。題准。前場卷錯印。後場卷號。後場卷錯印。前場卷號者。經管官。罰俸三箇月。經管用印官。將號印重印者。罰俸三箇月。其用印模糊者。罰俸三箇月。其經管木號印官。將木號印重送。及移送木號印字模糊者。罰俸三箇月。點名冊將姓名錯寫者。經管點名冊官。罰俸三箇月。卷冊相同。貼示錯寫字者。經管貼示官。罰俸三箇月。

凡編號。順治二年。定。將士子所坐字號。分爲兩截。如天字一號。天字爲一印。一號爲一印。自天



大清會典 卷七十一 二  
字起。至師字止。共七十二面。自一號起。至七十號止。共七十面。於編號時。排定七十二卷。先將七十二字之印。逐卷輪完。後將下截七十號數之印。信手探出。印於各字之下。每一巡畢。將此號印另收不用。以防重誤。但用筆卽係作弊。各省號房。數雖不同。一概彷彿此。○康熙三十二年。覆諭。八旗號房。著與漢人分編字號。另坐。○雍正元年。覆准。鄉會試硃卷字號。提調官將千字文內不佳字樣。如洪荒等字。俱行檢去。卷多省分。恐不敷用。舊例每字十號。今加倍爲每字二十號。試卷

少之省分。仍照舊例。每字列爲十號。

凡外簾四所。順治二年。定外簾四所書役。必取土著正身。以防頂替。凡卷面必印官役姓名。以憑稽考。四所官。俱要精明強幹。彌封官關係尤急。當量才授任。四所總門。除送薪水一次外。皆實封鎖。不得宴聚。提調監試。輪日稽察。俟謄錄對讀完日。方許撤封。○十六年。題准。舉子試卷自行污損者。照例貼出。若已交卷。係各所官役污損者。除文字棄燬不全外。餘俱註明某號卷某人污損。存冊外簾。其卷應謄進。仍將棄燬污

損之人。嚴行究處。○康熙二十四年。議准。嗣後外簾執事官。孔氏博士不必開列。使孔氏子孫入場無所迴避。以示優待聖裔之意。

凡受卷。順治二年。題准。受卷責任。全在稽察竊掠攙換。夜間尤宜慎防。○十五年。題准。墨卷錯落題字。及文內失格違禁。後場違式。真草不全等項。受卷失察。致應貼不貼者。降一級調用。不應貼出而貼出者同。○十六年。議准。受卷各役。在京。責成宛。大。兩縣。在外。責成附省州縣。選撥勤慎書手共十四名。造年貌籍貫清冊。送該提

調官。臨期選送受卷所。令本所官細心督察。倘有污損等弊。重責枷示。其有竊掠攙換迷失等弊。卽送刑部治罪。如該所官不能覺察。或扶同不舉者。知貢舉。及監試。提調官。一併察明會叅。分別輕重處分。該役。仍嚴加治罪。○康熙七年。題准。卷面籍貫不明。收卷官不行詳看駁回者。罰俸六箇月。如以書經卷誤收詩經卷內。交送彌封所。彌封所官又不詳查。錯印詩經字號。送內簾者。受卷所官。彌封所官。各罰俸三箇月。如自行檢舉呈明改正者。免議。

凡謄錄對讀。順治二年。題准。謄錄各役。各縣選  
送信實善書者。印其左臂。臨時驗臂而入。如謄  
時潦草淡抹。句字差落。些小失誤。責令重寫。重  
者枷革。若截去文字。那東移西。作奸舞文。以枉  
法贓律治罪。至硃墨必一色。卷紙必一律。並宜  
申飭。對讀生未經察對。以致內簾駁出者。該所  
官審卷後本生名字。卽發學黜革。對讀各生。不  
許干預書寫。違者。卽時呈堂。行革重究。○十五  
年。題准。謄錄書手。對讀生員。各府州縣。務細加  
考驗。擇善書樸實之人。開籍貫年貌。如有雇替

塘塞。將起送之官題叅。各役正身。並雇替之人。  
俱從重究罪。如硃卷內作字草率。遺落成行。硃  
淡無色。洗改洗補。責在謄錄。字訛句落。不細心  
詳對註改。責在對讀。倘有不遵。或內外簾查出。  
或本生首舉。各役各生。及各經管官。一併叅處。  
○又定。謄寫錯落。多至數行。被對讀對出改正  
者。或對讀慢不經心。任錯不改者。或內外簾糾  
叅。或磨勘時有經內簾抹出者。謄錄對讀官。各  
罰俸九箇月。○又定。對讀向用藍筆。各省叅差  
不齊。行令各省改用黃筆。以垂畫一。嗣後有故

犯者。官降一級。對讀生。行該提學黜革治罪。其因本所官之命誤用者。罰坐本官。本生免議。○十六年。議准。謄錄書手。行各府州縣。務令科場二十日前解送到部。該提調官按冊籍考驗。堪用者。印臂留用。不堪用者。責枷駁回。將原送官叅處。書手到所之日。聽該所官於每十名內。選取總書一名。以便責令稽查督率。其起送冊。應令各府州縣。一樣起送二本。一本留提調查驗。一本付所官查考。其有潦草淡抹者。該所官按其姓名。立行責治。勒令再謄。總書一併重責。如

有書手作奸等弊。所官指名呈堂。送刑部治罪。若所官不能覺察。經知貢舉官。監試。提調查出者。題叅處分。對讀生員。責成該學政。行各學揀選。年力精壯。文理通明之士。按年貌籍貫造冊。交送提調。內有點驗不對。及朦溷搪塞者。將本生黜革。開送官題叅議處。其臨時對卷。有字訛句落。不細心詳對註改。及謄錄洗補。對讀生不舉者。該所官查出重治。如對讀官不督率各生詳對。及明知對讀潦草。不行查舉者。經內簾發出。或知貢舉。監試。提調等官察出。該所官照例

處分。本生斥革治罪。其對讀向用黃筆。今改用紫。○康熙七年。題准。謄錄所見彌封所失印條記。不行呈明。令其補印條記。乃私自差役投送者。經管謄錄所官。罰俸三箇月。其謄錄書手姓名誤寫卷皮內者。經管謄錄官察出。不行呈明。罰俸三箇月。不行查出。亦罰俸三箇月。○五十二年。覆准。謄錄書手對讀生員。應地方官。該學政。選擇正身呈送。近有假充頂冒入場。代人作文。本生夤緣書吏。或暗遞白卷。或偷竊預備空白卷。給與代作之人作文。或閱他人佳卷抄寫。

弊端甚多。嗣後此等弊發。將代作併夤緣之人。及知情容隱。通同作弊者。俱嚴審從重治罪。其原送官員。及所官。酌量情弊治罪。○雍正二年。諭。闈中謄錄試卷。弊端甚多。其有賄囑者。則書寫精工。否則潦草舛錯。致誤佳文。著知貢舉及監試御史。嚴行申飭。其謄寫不工者。必重加責懲。令其重寫。并令對讀官員。嚴飭各生。悉心校對。勿使字畫錯誤。倘外簾官失於查察。日後發覺。將該管官員一併嚴加議處。

凡謄錄對讀號舍飲食。順治十六年。議准。號舍。

工部責成委官苦蓋修葺。若有浥壞傾壓等弊。知貢舉及監臨提調會同叅處。飲食責成供給。官親驗務令鮮潔。按時給發。有給發不時不潔者。聽該所官呈明貢舉堂查處。

凡彌封。順治二年。題准。彌封一所。硃墨卷面字號。俱從此印。弊竇最多。切宜重加防範。號簿封送監臨。人役嚴取互結。該所官親自印號。勿經人役之手。卷到。各官分經。及生員監生。信手掣籤用印。不許閑人窺看。墨卷號。必與硃卷相對。頭場號。必與二三場相對。卷號。必與簿號相對。

監生生員。必須分別。毋得相混。至於各役彌封時。須專心閱視。無使竊去。以致割換。見有折角針眼等弊。登時究治。封盈一箱。本所官親送堂上。仍約謄錄所官眼同交收。不許兩所人役近身私語。○康熙七年。題准。彌封所不於試卷上用條記移送謄錄所者。經管彌封官。罰俸三箇月。其應試生員試卷。各有應編字號。彌封官將卷面籍貫不明。不行詳看錯印者。罰俸六箇月。其主考官。原照所編字號中式。如外簾錯編字號移送。內簾於拆卷時未及查出。正副主考官。

罰俸六箇月。

凡試義。順治二年。定鄉試。八月初九日第一場。試四書義三篇。經義四篇。十二日第二場。試論一篇。詔誥表。內科一道。判五條。十五日第三場。試策五道。○又定。文有正體。凡篇中字句。務典雅純粹。不許故摭一家言。飾爲宏博。如有一連五句影響游移。幽僻險怪者。卽行罰處。○又定。後場博雅通達。而前場稍未純粹者。亦得兼收。○十二年。題准。南北試卷。俱不寫四書策論字樣。以歸畫一。○十六年。議准。場中作判。務宜隨

題剖斷。引律明確。不專以駢麗爲工。○又議准。鄉會應試諸生。文字內概不許作大結。○十七年。議准。二三場原以覘士子經濟。凡坊間有時務表策名色。概行嚴禁。○康熙五十五年。議定。舉子試卷。表聯須詞語清新。音律調諧。五判須剖斷精詳。律例明悉。五策須精切條對。不必多用頌

聖套語。

凡三場題目。順治二年。定策題以關切事理。明白正大爲主。不許搜尋僻事。揜匿端倪。必問者

列款而示。使對者可按牘而陳。庶乎真才易辨。  
○又定前場題目。將經書分段書籤。公同拈掣。  
如論語分爲十段。主考掣至某書某段。卽令房  
考於本段內各擬一題。仍書籤。候掣出者用之。  
餘題俱准此例。其京闈擬題已定。先莊寫一通。  
向

闕設案。恭捧安置。主考等官。行一跪三叩頭禮。待  
士子散題已畢。然後進呈。不過卯辰二時。鄉試  
順天府尹捧進會試。禮部堂官於朝房等候。儀  
制司於場前等候。俟內簾傳出進呈題紙。監試

提調各一員。齋捧出至大門內立。儀制司官於  
大門外立。覲面明交。卽將場門封閉。司官捧至  
朝房。隨堂官恭進。二三場進題同。○十五年。戊戌科會  
試。

欽定第一場四書題目。○十六年。議准。將孝經行義廣  
頌學宮。俾知效法。考官於後場論題。間出孝經。  
以勵士尚。○康熙二年。定。停止八股文體。鄉會  
試以策論表判。取士。分爲二場。第一場試策五  
道。第二場四書論一篇。經論一篇。表一道。判五  
條。直省學政亦以策論考試生童。○三年。題准。



春秋題目。鄉會試。併直省學臣考試。俱出單題。傳合比題。盡行刪去。○七年。定。仍以八股文取士。○又題准。正副主考。同考官。有出題錯字者。正副主考官。一處。罰俸三箇月。本經同考官。罰俸六箇月。正副主考官。二處。罰俸六箇月。同考官。罰俸九箇月。正副主考官。三處。罰俸九箇月。同考官。罰俸一年。自行檢舉者。正副主考官。罰俸三箇月。本經擬題同考官。罰俸六箇月。考試官將本身取中四書五經論表題目擬出者。降四級調用。若將本身取中題目擬出。又錯寫字

者。革職。內簾官錯出題目字樣。士子各習專經。不稟明監臨官傳進內簾官改正。照題紙錯字謄寫。以致中式者。罰停會試二科。主考官場內發題過卯辰二時者。罰俸六箇月。○九年。題准。春秋脫母等題。俱刪去。止以單題。合題。酌量均出。○十八年。議准。場內擬題。四書。掣定幾章。每題。每人各擬一道。五經。掣定幾章。每題。每人各擬十道。俱送正副主考寫籤入筒。當堂拈掣。○二十四年。議准。會試第一場。四書題目。恭請欽定。於初八日午後密封發與內閣。交禮部官密送內

大清會典 卷一百一十二  
五經 簾考試官刊刻給散。其五經及二三場題目。仍令考試官擬出。亦遵前例恭進。嗣後會試。併順天鄉試。俱照此例行。○是年第二場表題。由欽定密封。照前遣官捧送場內。○二十六年。覆准。二場詔誥題。士子例不作文。應削去。三場策題。止宜簡明。發問不得過三百字。○二十九年。議准。鄉會試二場。孝經論題甚少。嗣後考試。將性理太極圖說。通書。西銘。正蒙。一併命題。○四十一年。定。二場仍用詔誥題。○五十二年。

論。四書五經。皆聖人講理明道之書。貫始徹終。無非精意。近見鄉會試。俱擇取冠冕吉祥語出題。每多宿構倖獲。致讀書通經之士漸少。今後闈中題目。應不拘忌諱。庶難預作揣摩。實學自出。○五十四年。

論。科場出題。關係緊要。鄉會經書題目。不拘忌諱。不可出熟習常擬之題。朕常講易。及修定天文律呂算法等書。此等書題。人人皆擬。斷不可出。表題。亦不可出。修書賜書等類。○五十五年。議定。二場論題。專用性理。表題。不許出本年時擬近事。○雍正元年。覆准。考官若仍出熟習擬題。交與該部議處。○又論。孝經一書。與五經並重。

聖祖仁皇帝欽定孝經衍義。以闡發至德要道。誠化民成俗之本也。今自雍正元年。二場論題。宜仍用孝經。○是年特開

恩科。

欽定順天鄉試第一場四書題。

欽定會試第一場四書題。

二年。四年。五年。順天鄉試。會試。並同。

凡違式。順治二年。定。初場文字。每篇不得過五百五十字。二三場表。不得過千字。論策。不得過二千字。題目字句不得錯落。真稿篇數不得短少。謄真不得行草書。塗抹不得至百十字。卷頁

不得越幅曳白。及油墨污。他如初場破七也七矣七焉。承七夫七蓋七甚矣七乎七歟。起講七意謂七若曰七以爲。小結七蓋。大結七大抵七抑七嗟夫之類。二場表少寫年號。及賀表進表謝表錯誤之類。犯者貼出。三場五策題。應寫第一問第二問第三問第四問第五問。不得誤寫各題。違者貼出。若不屬關節字面。及不係大差者。不必苛求。不許堂貼。○康熙二十年。議准。前場文字。限六百五十字。若將逾額之卷。謄錄取中。照應貼不貼例處分。○二十六年。覆准。凡科

場試卷。油墨污染。字畫猶可辨識。卷頁稍有破損。及題目字樣。表判策內一定字樣。點畫遺誤。擡頭小差。草稿錯落等項。原無關於弊竇。相應停其貼出。其每篇踰限字之例。及塗註字數太多。亦停其貼出。○又覆准。順天鄉試。會試。原有空白試卷十本。交於外監試御史。如遇遺失。錯污等項。許查明給發。嗣後應多備空白卷候用。○又覆准。定例內並未開有避諱考官名字之例。嗣後凡考官名字。不必避諱。

凡官卷。康熙三十九年。議准。在京滿漢文官京

堂以上。及翰林。科道。吏部。禮部。司官。武官。叅領以上。在外文官。藩臬以上。武官。提鎮以上。其子孫。同胞兄弟。及同胞兄弟之子。鄉試。滿洲。蒙古。漢軍。滿。合。字號之下。直隸。皿。貝。字號之下。各省卷面上。俱編官字字號。另入號房。會試。滿洲。蒙古。漢軍。滿。合。字號之下。直隸。各省。南北。字號之下。亦各編官字字號。另入號房。各項貢監。由監鄉試者。國子監收錄。照例分別官民卷。歸本省經。滿。合。字號。大臣官員子弟居多。如民卷一百

卷取五卷。則官卷二十卷取一卷。其直省。如定額十卷。民卷取中九卷。官卷取中一卷。其副榜亦照此算取。其各省鄉試。官員子弟數少者。不必另編官字號。會試。雲南貴州四川廣西額少。不必另編官字號。其鄉試夾字。且字。耳字。聿字。丁字等卷。亦不編官字號。○五十一年。覆准。陝西甘肅寧夏文武大臣子弟。不必編入丁。聿。字號。彙入通省文武大臣子弟。內同編官卷。憑文取中。○又議准。會試官卷停止。

凡迴避。順治十五年。題准。除實係同宗照例迴避外。其餘同姓無干之人。及先會同譜。今遵

諭禁革。聯宗絕往來者。應憑文去取。不准仍引宗誼避

嫌。○雍正元年。考試迴避士子於

午門內。奉

旨。元年特開恩科。其迴避士子內第一第二第三第四卷。并落卷九人內第一卷第二卷。共六人。俱取中爲舉人。以示鼓勵人文之至意。○二年。

諭。鄉會試爲掄才大典。內外簾官子弟。理應迴避。但跋涉數千里。志切觀光。旣至京城。不得與試。深爲可憫。朕於上科特降諭旨。另行考拔。然此只可暫

大清會典 卷七十二  
行。不便著爲定例。今科凡官員入場者。其子弟著一體應試。將試卷另封進呈。朕派大臣校閱遴選。庶人才不致屈抑。

凡揭曉。順治二年。定闈中閱卷。須立程限。計自分卷以至撤棘。約可半月。以八日完前場。以七日完後場。草榜填號。外簾俱不得與。草榜已定。臨填榜時。方延入監臨等官。共同拆卷對號。拆號之日。隨將硃墨卷並粘。硃卷大書名姓。墨卷大書名數。監臨隨督同外簾官將硃墨卷逐一磨勘。硃卷字號無差。及文字內無關節可疑字

樣。卽用印鈐蓋。差人星馳解部。以憑磨勘。拆號既畢。填寫已完。正副二榜同貼。不得先貼副榜。致妨勘對。亦不許過時方貼副榜。致滋弊竇。○十五年。題准。不許場內刊刻錄條。只許繕寫進呈。出至衙門。方許刻錄。如有盜錄飛報。在內五城御史。在外撫按。及地方官。嚴拿重究。被索之家。許首告。○康熙二十四年。會試三場畢。主考等官遴選試卷十本。繕寫進呈

御覽。自第一名至第十名。俱由

欽定名次。仍送場內拆號填榜。

以後會試。及順天鄉試。並同。

○二十

六年。覆准。會試。及大省鄉試。寬期於三九月初五日揭曉。○五十年。議准。會試揭曉日期。原於三月初五日內。今寬限三月十五日內。鄉試揭曉。大省。原於九月初五日內。今寬限於九月十五日內。中省。小省。俱於八月內。今寬限中省。於九月初十日內。小省。於九月初五日內。○雍正二年。

諭。每科會試。及順天鄉試。例於揭曉前先進元魁十卷。但止頭場文字。嗣後將二三場一同繕寫進呈。凡程文。順治十五年。題准。程文用諸生原墨稍

加裁訂。違者。降三級。

凡闈墨。康熙三十二年。覆准。刊刻闈墨。務照原卷。若主考不照原卷發刻。及江浙各處選墨擅行改易。冒稱原卷者。事覺。嚴加察議治罪。○又題准。鄉試闈墨。禮部照每名原卷。各刻四書文三篇。進呈

御覽。併頒發直省學臣轉行學宮。○三十三年。覆准。會試墨卷。亦照例刊刻頒發。○四十三年。題准。嗣後鄉會試卷。禮部停止刊刻。○雍正元年。覆准。各省鄉墨。禮部會同翰林院。選擇醇正典雅。

大清會典 卷一百一十二  
理宗傳註。可爲程式者。恭呈

御覽。覽定。頒發。直隸。交與順天府尹。江南。交與江蘇巡撫。給與情願刊文之人。刊刻流布。會試墨卷。亦遵此例頒行。並照原本。不得擅自增改。其舉人。進士。窻稿。及行書。房書。亦送部選定發刻。倘有私刻。該地方官嚴查禁止。

凡試錄登科錄。順治二年。定。揭榜以後。刊刻試錄。登科錄。進呈。○又定。正副主考。如有丁憂事故。不會入場者。試錄後序。用同考官銜名居首之員撰刻。祇許撰序。不許干預主考之事。○十

八年。題准。停止刊刻試錄。惟於場內繕寫題名錄。解送進呈。○康熙八年。議准。復行刊刻試錄。登科錄。○十四年。題准。復停止刊刻試錄。○十七年。定。各省科舉題名錄。俱照河南體式刊刻。○二十三年。議准。鄉試。會試錄。併進士登科錄。俱照例刊刻。○二十六年。題准。各省鄉試。主考官出闈之後。刊刻試錄。許在省一箇月。無故踰限者。各該衙門查叅。○五十一年。

欽取進士。禮部將取中姓名籍貫。另刻一紙。附入試錄。○五十三年。議准。文武進士會試錄。及題名錄。



大清會典卷七十二  
考完時業經呈

覽部內再行刊刻。事屬重複。應行停止。其各直省文武鄉試題名錄及試錄亦著停止刊刻。至文武進士

殿試登科錄內載

御製策題。



恩榮次第。並無重複之處。仍照舊例遵行。○雍正元年。覆准。鄉會試錄。自癸卯科為始。仍行刊刻。○又題准。順天鄉試錄。將考官迴避之子弟補考。欽命題目。

欽定批中舉人姓名籍貫及搜落卷內。

欽定批中舉人姓名籍貫。照壬辰科例。一併列入試錄。

大清會典卷之七十二

三



大清會典卷之七十二

文政三

